

**Jangan pandang rendah IPT tempatan - TPM  
Utusan Online  
23 Mac, 2012**

PUTRAJAYA 22 Mac - Timbalan Perdana Menteri, Tan Sri Muhyiddin Yassin hari ini menasihatkan lepasan Sijil Pelajaran Malaysia (SPM) dan Sijil Tinggi Persekolahan Malaysia (STPM) supaya tidak memandang rendah kredibiliti institusi pengajian tinggi (IPT) tempatan.

Beliau yang juga Menteri Pelajaran berkata, IPT tempatan kini setaraf dengan universiti luar negara, malah ada di antaranya berada di kedudukan yang lebih baik berbanding IPT luar.

Katanya, kerajaan memberi perhatian khusus pembangunan IPT tempatan yang menjadi tempat pembangunan modal insan bagi pelajar yang ingin melanjutkan pelajaran ke peringkat lebih tinggi mengikut bidang pilihan masing-masing.

"Apa yang penting ialah pelajar ingin melanjutkan pelajaran jangan tersilap pilih tempat untuk menyambung pelajaran.

"Memang tidak salah memilih universiti luar negara, namun pelajar kena pastikan betul-betul agar universiti berkenaan memiliki kedudukan yang lebih baik berbanding dengan IPT tempatan," katanya.

Beliau berucap pada Majlis Sepetang bersama Gabungan Anak Pagoh (Gapa) di Sri Satria di sini.

Hadir sama, isteri Timbalan Perdana Menteri, Puan Sri Norainee Abdul Rahman dan Pengerusi Gapa, Mohd. Hanafiah Omar.

Menurut Timbalan Perdana Menteri, IPT tempatan yang kini menjadi aset negara dalam pembangunan pendidikan menawarkan banyak pilihan kepada lepasan sekolah.

Muhyiddin turut menasihatkan pelajar yang memperolehi keputusan cemerlang menggunakan peluang yang ada untuk meningkatkan ilmu pengetahuan masing-masing.

"Sistem pendidikan dahulu amat berbeza dengan sekarang, nak sampai ke menara gading amat susah ekoran kekangan ekonomi, namun, kini segala kemudahan sudah ada dan banyak cabang yang boleh dipilih untuk memantapkan lagi ilmu masing-masing, jadi gunalah peluang ini sebaik mungkin," katanya.

Dalam pada itu, Muhyiddin meminta graduan yang berasal dari Pagoh terus menyumbang idea kepada pembangunan kawasan tersebut dalam usaha untuk menjadikan ia sebagai bandar contoh.

Katanya, kumpulan itu juga perlu merebut peluang yang dapat menyumbang kepada transformasi daerah tersebut agar ia maju seperti yang diinginkan kerajaan dalam menjayakan pelan transformasi kawasan luar bandar.

"Banyak cara yang boleh dilakukan termasuk menggunakan teknologi moden dalam kegiatan penternakan dan penanaman serta pengurusan bidang tersebut," katanya.

Source:

[http://www.utusan.com.my/utusan/info.asp?y=2012&dt=0323&pub=Utusan\\_Malaysia&sec=Dalam\\_Negeri&pg=dn\\_04.htm](http://www.utusan.com.my/utusan/info.asp?y=2012&dt=0323&pub=Utusan_Malaysia&sec=Dalam_Negeri&pg=dn_04.htm)